

瞿忠宣公集卷四

畱守封事

飛報大捷疏

奏爲飛報大捷仰慰聖懷并請聖駕速幸桂林以圖大業
事本月初九日十一日臣已將全陽禦□情形兩具疏入
告矣十五日辰時接督輔臣何騰蛟自興安寄臣手書云
十四日辰刻各營飛報大捷□懷順王與佟養和僅以身
免□俱遁走黃沙本日巳時接南安侯郝永忠露布據稱
□□大輿剽全孤城久困報援星急本爵親統大兵出灌
恢道于興安聞警一面發兵扼守灌陽一面統兵星馳援
全本月十三日辰時同盧焦滇三營至腳山離全二十里
三營繇大路往全本爵繇小路午時抵全至北關□于北

門札營勢甚□□本爵身先士卒率標鎮馬騎直衝□營
□交鋒大敗奔潰北走我兵直趕三十里殺□千餘級生
擒二名奪大西馬三百餘匹小馬無算火礮弓箭衣甲器
械不計其數□奔逃自相躡死者無數雖本爵親冒矢石
實將士爭奮用命謹將該營□□情形據實露布等因又
據滇營總兵官趙印選露布□□懷順王攻圍全州十一
日督師調度各鎮兵馬策應援全至十三日午時郝盧焦
督率本管馬騎精兵相援本鎮發本管精騎分頭齊進直
抵北關太平堡□□七營大勢齊迎胡一青當頭立砍生
□三級各勳鎮協力奮勇□寇奔潰斬獲生擒無算奪獲
騾馬三百餘匹頭弓箭衣甲千計所有各鎮有功員役另
行塘報等因又據全永鎮臣王有成全永道臣馬鳴鸞塘

報據稱新興伯焦璉十三日卯時入城辰時發衝鋒銃牌老營兵馬出南北兩門聯得數捷焚燒北門一營打敗湘山營至午後又發各營銃手雄兵打死步口無數鐵騎數十口口敗遁我兵追截大獲全勝追至二十里外天晚收兵回營等因臣等讀竟不覺喜而欲狂也夫口之敢十犯全猶以湖南故智料我也料我各鎮之兵或未必齊心協力且焦盧二鎮及滇營雖分信全陽而出師多有先後乘其渙散而圖之全可唾手而得也豈焦兵之扎城內者恪守將令惟堅壁不動以待援師之來初六日宜章之師已殺追鎮之眞口初七日新興之將又挫攻城之驍口迨初十日督輔臣身坐興安約齊三勳滇鎮會議合師惟時四營連發萬馬齊驅真有排山倒海之勢口雖強有不披靡

辟易盡氣狂奔而尙敢逆我顏行一矢相加者哉是役也
躬冒矢石身先士卒以收破口奇功則南安侯郝永忠宜
章伯盧鼎新興伯焦璉與滇鎮趙印選胡一青誠不媿標
名麟閣而百計鼓舞多方激厲自十月初五至本月初十
手口兼劬心血俱殫督帥諸勳鎮成此大功則皆督輔臣
何騰蛟一人之力而輔臣嚴起恒憲臣劉湘客科臣萬六
吉督臣于元燧按臣魯可藻與臣式耜調停措置備極苦
心左右贊襄不遺餘力殆未可謂因人成事者也今東永
固在掌中衡長武寶一聞此信王馬張袁諸鎮勢必分道
四出并力齊恢從此奏凱捷書有不接踵而至者乎桂林
固楚粵適中之地也我旣可得志于楚斷無門戶之憂而
東之肇廣又漸次全恢皇上不于此時幸桂更復何待哉

今龍舟御輦猶且飄搖水殿徒倚江干外有風露之虞內無周廬之衛徒益重臣等之罪耳于是公議臣式帮在桂料理畱守事務臣起恒卽日躬迎聖駕伏乞皇上毅然張主夙戒舟車星言移蹕會城以爲宅中圖大之舉此真宗社之福臣民之慶而中興之大業指日可奏矣臣無任懽懽瞻仰之至謹具疏奏聞仰慰聖懷伏候敕旨

永歷元年十一月十六日具奏奉聖旨覽卿奏全陽奇捷真中興戰功第一朕已刻期蹕桂策勵勳鎮及捷書適至慰朕眷望奏內諸勳鎮攻城血戰斬獲功多督輔臣騰蛟激勵指縱克奏殊勳并卿等督撫按道各臣措置調停贊襄勞瘁增朕篤念有功文武速行優敘該部知道

變起倉卒疏

奏爲變起倉卒禍出非常謹陳不能扈駕之情仰祈皇上俯賜鑒憐事臣之召覺而速禍蓋自請蹕桂林之日始也臣實不能如衆臣之人趨人諾故矢心發議必從宗社起見九月中南安勳臣永忠堅欲畱皇上于柳州而臣必欲迎駕入省時衆臣卽爲臣危之謂必觸其兇鋒而臣終不能違心而行也正月二十七日南安勳臣永忠自興安來省不過欲皇上移駕柳州兩次召見臣不與聞但聞二十

八日皇上堅持蹕桂林之說私心竊自慶慰而勳臣之意則又大拂矣謂必過聽臣言而然也自此窺其神氣日緊一日雖酬酢往還自如而臣實自知不免矣二十一日酉時臣在閣中忽聞永忠匆匆入朝亟出訊之乃知爲口逼與

安之報至也臣見其神色大異平時心竊怪之口卽來豈無塘報先傳胡爲突如至此逆知其意在脅駕行也見上後卽匆匆辭朝帶兵出城臣與諸臣又心竊壯之方冀其屯兵數十里內外偵探堵禦旦晚定有好音更餘出直暫回私寓危坐以待漏下三鼓忽報洪監軍到門云南安已入城且進朝矣口已入嚴關矣臣亟趨朝詳問端的時永忠及宜章伯盧鼎與勳臣馬吉翔樞臣蕭琦俱聚司禮臣之家臣聆永忠議論則以人馬挫折意懶心灰竟欲卽刻整旅西行絕無意于省城者臣旣以好語慰之復以正言規之而柄鑿不入比入見皇上則暫避永福之聖意已定臣竟無從插齒只爭起駕之時刻耳臣猶力爭謂卽使口至興安督師應有報至今尙無片紙之來何至刻不能待

如此皇上聲色俱厲謂今日事勢遠過武攸爾等必欲畱
朕兩宮太后卽煩爾等照管臣惶懼顛顛隨借諸臣而出
比至閣中勳王樞臣皆就臣問隨駕與否臣茫無以置對
又勸臣宜自爲計蓋先是臣三鼓入朝亂兵持火衝門沿
街塞巷兒啼女哭已不堪聞諸臣逆知臣必不免故以相
諷而臣心中所焦愁煩懣惟聖駕之亟于西行餘曷計焉
五鼓臣又獨入見面奏上云聖駕卽欲行宜少從容蓋亂
兵乘駕發之後必有一番搶攘聖駕稍停一可以救滿城
百姓二可以救滿朝百官而皇上如不聞也臣退回私寓
時天已漸明滿案文書章疏俱不暇整理惟恐乘輿早發
不及一送遂亟亟出門順路投永忠一柬而適不相值付
之一歎途中接趙印選一疏何騰蛟一書反覆披閱畢竟

□□尙無長驅確信臣且歎且憤驅車入朝時隨駕諸臣車馬匆匆有行色矣司禮臣又傳召對臣亟趨而入見諸臣已寂無一言臣又不識忌諱再奏皇上姑且從容現有督師之札可証時天顏愈厲天語愈嚴臣惟叩頭請死含淚而出擬于朝門候駕發隨送一程以盡患難君臣之誼詎知甫離殿陛而家丁來報臣家已被抄搶矣比入門而亂兵持刀張弓填塞臣居臣之老妻稚子驚怖號哭苦無避處時忽有郝營二官頭來禁止亂兵始毀垣穿屋而去會未一刻而數十官頭持刀張弓直入中堂逼臣索稿矣臣未及轉身卽擁入內室刀斧之聲耳不忍聽凡臣從自家中攜出一二圖書清玩之物及臣妻簪珥衣飾之類昨年捐餉所存者搜搶無遺矣更番而進者一無所得遂愈

猙獰暴狠楚毒遂及于臣身肩背腰脅無不重傷牽曳捽
撲以白刃加于頸者數十次歷辰巳午未四時地獄變相
無所不嘗寄命刀俎四顧左右絕無一人何能訪問聖駕
起行之事前者端州桂林兩番移蹕曾有如今日之君臣
不能相顧者乎臣叨仕籍三十三年備位輔弼品地不爲
不尊忠勤服事皇上二載勉効犬馬臣誼不爲不盡今天
降禍孽遭此慘變總爲畱守地方擁護皇上得罪忌已之
人使如高飛遠舉諸臣安得有今日之事使皇上稍聽臣
言一二或侯永忠行後與諸大臣商確居守一番然後移
蹕則所保全實多而是時皇上去桂城惟恐不速何暇轉
念及臣臣一身固不足惜但使人謂癡愚老臣一番擁戴
逾年畱守以持正不屈受強鎮抄洗凌辱而皇上曾不能

一庇之此後恐欲如臣之癡忠報主至死不變或未易責之明哲保身之輩也但皇上雖棄桂林而臣尙必欲畱桂林始終無非爭此一塊土以還祖宗爭此一口氣以謝天下若不克如願臣惟有以身殉之而已爲此瀝血哀籲并陳不能扈駕之繇筆與淚俱忘其唐突罪當萬死

永歷二年三月初一日具奏奉聖旨卿力守危城致櫻慘禍覽奏殊深憫惻郝營弁日肆掠大臣已干法紀業切諭勳臣永忠逐一察明分別究處卿還善自調攝早赴行營啟沃以資佐理該部知道

恢復寶慶疏

奏爲寶郡一鼓恢復事本月初五日準督師閣部何塘報前事據標下職方司主事李甲春原翰林院簡討姚大復

報稱寶慶一府職等前與總鎮陳友龍已經會師恢復後
陳兵派餉一倍十倍以致百姓迎口兼以郝兵入靖陳兵
潰回寶復爲口所踞職等奉本閣部嚴命於十八日帥兵
萬餘一仗決勝斬級二百零五顆生擒三十四名奪大西
馬五十餘匹有功員役另察冊報口遁洪橋我兵屯營寶
城外五里扼其要路此係恢郡捷報懇乞奏聞等情到案
本閣部看得寶慶一府東通長郡南連衡嶽西界武靖表
裏山河誠楚之大郡也前檄陳鎮友龍恢復本閣部鞭長
不及終少調劑以致旋得旋失今發監軍御史余鷓起躬
督標下職方司李甲春之兵乘口初入腳跟未定一鼓恢
復厥功偉矣然湖南北之眞口畢集永陽本閣部調四爵
之兵無日不戰無仗不勝阱此數萬豺虎衡寶之口自在

目中寶慶恢復又可省一番籌戰之勞矣理合塘報煩惟
轉奏等因到臣該臣看得寶慶之旋得旋失也繇于郝永
忠之兵入靖陳友龍調兵回顧衡之援口乘機再入今幸
督師輔臣騰蛟方略布置一鼓恢復與永捷之報同日並
馳各路奮勇軍聲大振雖口口終固山張固山兇鋒簇擁
不過敗衄之餘我師所到勢同拉朽矣臣等仰仗皇上威
靈獲茲奇捷據實轉報恭慰聖懷可勝踴躍待命之至

永歷二年六月初六日具奏奉聖旨寶慶再復軍聲不
振湖南上下俱已蕩平朕心嘉悅有功人員察明彙敘
該部知道

永城大捷疏

奏爲永城大捷仰仗天威恢復事本月初五日未時準督

師閣部何塘報本閣部前後檄調曹趙焦盧四爵之兵及標鎮我旗六營攻圍百日大小四十六仗□□乃成困局本閣部繇粵省而全陽繇全陽而永陽躬帥士馬斬關奪要譬之解牛者解其脊破竹者破其節爲其難不爲其易也前月二十七日午刻據祁陽鎮馬兆麟報有援口張固山佟固山兵突至樟木塘本閣部飛發威口將軍胡一青標鎮馬養麟姜文選兵馬二萬拒之于祁下令兩河環攻困口莫支乃於本月初一日酉時一鼓而下間有騎口脫走者卽行尾追不令與援口勾合致蔓難圖本閣部躬督各營直躡其後所有有功將士不暇核實草疏奏聞理合先行塘報等因同日卯時準新興伯焦璉塘報爲飛報恢永大捷事本月初四日卯時據爵下統兵各鎮將趙興

吳應夔等塘報前事稱本月初一日寅時□□見我兵四面圍逼□發馬步千餘向本營衝突與等奮勇堵截斃死者不計其數擒獲四十七名□□計窺回城閉拒督師閣部何知□勢危岌申刻復令四面環攻除分布曹滇各營攻打東北各具塘報外本營鎮將與督標等官奮勇攻打大西門瀟湘門至戌時攻破殺入永城斬級奪馬甚多未察其數四面大師齊進餘孽竄逃循河追斬淹死無數有功官兵及獲馬匹器仗另行察報合就轉報各到臣該臣看得□□數萬擁踞永城以抗我師督師臣騰蛟調集保昌新興新寧宜章四爵之兵及標鎮各營先後湊集晝夜攻圍水陸並進而□□亦日逐發馬步精銳衝城而來與我師對持鏖戰賴督師臣調遣布置隊隊廝殺□□不能

支持輒退保城內死拒不出會援口報至督師臣一面飛
遣勁旅迎戰一面下令環攻諸勦兵馬分布各門一齊奮
勇先登遂于本月初一日一鼓而下克復永州入城之日
救全難民男婦安堵如故所有生擒砍殺口口萬餘奪獲
口口馬匹器械不計其數是役也仰仗皇上之天成廷臣
之妙算督師臣與諸勦鎮臣之苦心血戰故能馘名王之
首剽可汗之腹立開三楚之疆固益堅兩粵之門戶且不
惟恢復一大郡爲可喜實實殲盡勁口一枝窮廬膽落而
衝長武漢破竹之勢無復棘手處矣至于有功將士不能
一時察實除督師臣另核奏請外今準督師臣同勦臣曹
志建焦璉先後塘報並至謹據實開奏仰慰聖懷臣式紹
可勝踴躍懼忭之至

永歷二年七月初六日具奏奉聖旨永城負固幸勳輔騰蛟躬冒矢石諸勳鎮僇力同心卿等關中接濟轉輸無缺一鼓盡殲中興武功焜耀簡冊敘疏到日著從優議敘以答殊勳該部知道

酌定監司位置疏

奏爲監司位置紛紜請旨就近酌定仰祈敕部覆允以便遵依事粵西自殘破之後兵擾口踐大小文武臣工狗馬心力殫竭茲土者二年于茲矣今日固非無事之日也瘡痍未起皮骨僅存惟藉辛勞外吏稔悉風土習知利病者重新整頓加意撫綏惠此一方故臣于七月間咨移撫按酌補司道各員或加級以示優或量才而授任總爲共事巖疆始終收拾不過從地方起見豈有私乎如沈閔中邵

之驛鄭國藩王奕昌馬良遠等五員以不容泯沒之勞有
邀恩敘擢之請而該部竟高閣置之除鄭國藩新經參論
邵之驛已轉分巡尙有三人茫無著落乃糧儲道則補張
美中矣驛傳道則補朱統筭矣喻琦慶且捧部劄以副使
兼參政虛銜來省矣臣展轉思維漫無適從閩中雖題陞
右布政管左布政事兼理鹽法未蒙覆行也謂其以措應
拮据之首功而漠視姑置之臣等心能安平琦慶雖止布
按兩司虛銜固儼然有吏部印劄內載明旨煌煌也謂其
冷守荒寓不與以展布之地臣等心又能安平糧道自鄭
國藩被論繳印到司臣會同撫按批發原題王奕昌接管
視事美中尙不見入省也若俟其入省又更易之未免煩
擾若徑無以位置之奕昌履任美中投閒臣等又心能安

乎嗟乎部授之銜劄旣無棄置閒散之理邊疆之勞吏亦無無罪廢斥之事臣以爲如沈閩中者積勤積苦戰守著績宜特擢右布政使掌印兼理鹽法臣非欲添設右轄一官直謂閩中破格歷階未便越右躋左故以右銜管左事此較便也如喻琦慶者宜仍以布政司右參政兼按察司副使署按察司印如王奕昌者宜仍以布政司參議管清軍糧儲道而分守桂平道臣等原題鄭國藩今旣被論則張美中宜仍以布政司右參政管分守桂平道臣細酌熟商逐一分布務期名實相稱人地相宜如此則地方之各官與部陞之銜職庶各予以應得之分而官方不至舛亂而無紀矣伏候聖鑒敕部補本施行

永歷二年十月二十日具奏奉聖旨吏部速議具覆

請派餉疏

題爲合詞公請派餉以資捷伐事該臣等接閱邸報見慶國公陳邦傳一本爲亟請畫一等事奉有桂林暫給焦勳柳慶合供本鎮高雷廉還東梧州還西之旨臣等伏而思不能不仰而有請也桂林編糧幾何灌陽久屬保昌侯志建徵收全州又近爲督師輔臣供恢永官兵之用而他屬縣自春夏以來兵馬屯集悉索盡矣新興侯焦璉麾下戰兵萬餘年來苦掙地方得有今日卽此萬餘之部曲也該勳以封疆爲性命以百姓爲身家念征繕之無從遂簪珥之不惜幸而大勳告成忍見枵腹如故強梁者日憑陵以不堪循禮者僅仰屋而興歎乃尙日桂林暫給也況桂林已盡之餉又如畫餅不可充饑哉臣等僅公議平樂府爲

陳邦傳所棄勳臣璉所血戰收復之地其富川平樂修仁
荔浦既經撥解曹志建餘者賀縣昭平永安州耳而梧州
一郡原經部派勳臣璉額餉爲數頗多伏乞皇上俯念戰
兵有功措餉甚苦合無允臣等所請將桂平梧州三府除派
與別勳各縣外其額解京邊銀兩準今臣等察實催徵務
令每年足解五萬兩之數雖該勳萬餘兵馬非十餘萬不
足備一年之支給而仰體國帑之乏俯念民力之艱臣等
公議僉同惟此妥確旣少充新興勳鎮營兵之需又不虧
朝廷措處犒給之費庶軍士不致號饑卽躬擐甲冑親冒
矢石者亦不向隅飲泣咸感天恩于無旣矣臣等曷勝悚
仄待命之至

永歷二年十一月初七日具奏奉聖旨桂平梧州三府京

邊每年足解五萬兩其餘聽卿等留充兵餉仍按季造冊報銷戶部知道

嚴定監司郡守疏

奏爲監司一缺兩官郡守無缺疊補特疏請明仰祈敕部嚴定以便遵依事臣于七月間移會撫按二臣以守桂有功各官酌量題陞總不過就地因人量才受職非專爲酬勞地也乃銓部竟漠然視之止將臣另題之路太平邵之驛具覆而沈閣中王奕昌馬良遠則竟不與位置束之高閣近且以朱統銓爲驛傳屯鹽道張美中爲通省糧儲道矣臣方訝奏請不靈而適接邸報府江分巡道則又用沈兆祖矣臣于五月間將府江道于元煦題陞鬱林巡道而以朱統銓題陞府江道部覆俞旨隨給敕書受事不過三

四月而今新官又繼之豈因該部遷徙靡常豕臣已換文卷冊籍俱無可考耶當此缺少人多之日卽無望久任而數月監司突然更換無罪而去其何以服人心也至于平樂府官見任者爲楊永泰永泰從未經陞轉臣近方題僕少而以兵部主事曾大應補之命猶未下也而勳臣邦傳則委謝者乘無憑無劄徑來赴任矣昨見邸報則又以朱議沆爲平樂守矣議沆向爲南寧守曾經按臣吳德操糾參奉旨拏問追贓不知部中如何沈閣今又奉新旨突如其來計按臣當自有言第念一平樂也見任接任新官舊官遂得四人豈銓部專以地方爲徇情之具但有所請或奉旨下部者不暇該其有缺無缺姑以塞其責耶臣畱守會城凡官員之更置臣得便宜主之今日擊新舊紛紜而

不具疏請明將來彼此推卸隳職守而誤地方其故非小故敢冒昧陳之至如沈閩中見任分守道署今司印敘功覆疏雖已陞參政亦未嘗實指何道何官而喻琦慶以一人兼布按二司之虛銜領部劄而來矣其又將以何缺安置之又如鹽法道原係布政司官往者鹽法屬右布政官崇禎朝因裁右轄故并糧鹽于一道今自應如臣前所題仍歸鹽于右轄乃朱統鈐奉旨之銜則驛傳屯鹽道殊不知清軍屯田乃驛傳之事此按察官也以按察司官而管布政司事不爲侵官乎改歷年之官制起司道之紛爭似又不如仍舊之爲妥也臣敢并及之伏惟皇上敕部改正施行臣無任悚息待命之至

永歷二年十一月十三日具奏奉聖旨司道府縣缺官

該撫按咨部題推或就便調委卿職當畱守一切更置
惟卿調度本內事情著速議妥覆毋使新舊紛紜致彼
此推卸嗣後布按各官職守仍著遵照舊制推行該部
知道

請移蹕桂林疏

奏爲楚疆漸就底定亟請蚤移聖蹕據上游以規中原慰
後望以信敕諭事臣于十月二十一日接到都督同知王
家瑞齎捧敕諭一道皇帝敕諭輔臣瞿式耜朕聞奠萬年
之業者以審圖形勝爲上計慰兆民之望者以收拾人心
爲要圖朕以藐躬祗承鴻業鼎新蠱幹夙夜維艱幸天心
厭亂江粵告平郢楚漸復朕與二三臣庶諮度廟謨惟是
控扼荆襄以規石頭天塹衆議僉同朕心俞悅嗣以東粵

新附久不見大明天子必欲望朕顏色雲霓之想實切來
蘇朕不得已暫蹕端溪召見勳臣成棟及佟養甲耿獻忠
等料理東土綏輯遺黎卽命勳臣成棟督率大兵援江恢
闔俾朕無南顧憂朕隨返蹕桂林星駕湖南直趨建業展
謁陵寢志固未嘗須臾忘楚也恐楚粵諸勳鎮謂朕偏安
東粵緩圖中原特敕卿等慎勿輕信俟捷音一至卽當與
卿及勳輔騰蛟握手面商晤期不遠卿其明體朕意布告
將士咸使聞知欽哉特敕欽此欽遵臣謹于私寓恭設香
案望闕叩頭謝恩訖臣隨會勳臣焦璉按臣吳德操率領
三司沈閣中等恭展拜誦仰見我皇上宅中國大之規模
夙哉其宏遠矣今者永陽新捷衡寶告平督師勳臣之勝
氣方且迅掃長岳直驅武漢恢恢乎其有席卷中原之勢

獨是萬乘之尊久滯嶺海天威高遠行間將士鼓舞不靈
臣嘗惜之臣固知我皇上之不肯偏安東鄙也敕到之日
萬姓歡呼三軍踴躍而捷音隨至凱檄四傳豈非天心効
順聖懷感格惟是今日之勝局以必幸楚爲主而幸楚以
必西上爲主誠恐廷臣偷安習便以東省爲未經殘破而
狃于目前坐失大計遂使王言不信四方灰心耳臣今不
敢飾詞謹援皇上幸楚之敕書與永全告捷之吉期申布
大小文武臣工待幸之誠切冒昧懇奏仰祈速賜定議星
駕六龍入桂而後入楚入楚而後規定中原臣知二祖有
靈皇威宣播從此天下不足平也臣無任惶悚待命之至
永歷二年十一月十五日具奏奉聖旨覽卿奏請幸楚
上控關中下規金陵誠屬根本至計第以東勦部曲方

出庾關朕竚聽凱音再與卿面定中原大計該部知道
不敢輕離西土疏

奏爲微臣實無佐治之才衰齒更當多病之日恭捧敦綸
彌增戰懼謹瀝誠悃恭申謝忱事臣之曠遠天顏十閱月
于茲矣皇上之以敕召臣者凡三四矣豈真欲自外于聖
明實有萬不能勉副其心者十一月初三日欽差錦衣衛
都指揮使徐起鴻齎捧敕書一道到臣寓所臣恭設香案
行五拜三叩頭禮謝恩畢恭啟敕書宣讀皇帝敕諭輔臣
瞿式耜朕倚卿再造以續丕基篤念元功曠代鮮儷蕭曹
高密尙受指于高光房杜鄴侯僅典籌于文肅而卿以補
天之手效致主之忱安社稷于苞桑奠疆土于磐石使朕
得從容廟議匡復多方黔蜀載綬滇楚漸靖粵東江右共

奉赤符七閩三吳佇歸白水皆卿內寧根本外暢聲靈所以不謀來同翕然感應今朕次端水期出豫章迅指金陵以新陵廟眷求良弼爲中外所具瞻爲夷夏所咸服惟卿名德實所儀刑茲特差侍衛徐起鴻宣敕敦召卿其嚴裝夙詣行在以匡不逮尙其輔予如以八柱之控楚服不可無重臣以彈壓卿之威望遐陬僻壤莫不震動在內猶在外也卽萬有難釋不嫌入總端揆出兼機務庶慰倚毗無困寤思欽哉特敕欽此臣不勝惶悚不勝慚慙伏念臣迂愚陋質譎劣庸才旣無撥亂反治之能時深妨賢病國之懼兩年畱守偶值時會之適然數月綸扉已見平章之無狀然正以平章日淺故罪戾或覺少輕假令軍國時肩其指摘更當何若臣之分量惟臣自知卽畱守幸告無罪不

過仰藉我皇上之威靈督師輔臣之方略諸勦鎮將之忠
勇得保此殘土殲彼兇裔臣何力之與有敕諭云卿以補
天之手效致主之忱安社稷于苞桑奠疆土于磐石臣滋
愧汗矣至臣于恢全之後再請畱守實因督師臣騰蛟躬
率諸勦僇力南楚天子聲靈漸遠自合居中接應臣有何
威望彈壓邊陲臣今日保固中興根本之區以待六龍西
幸且使江楚滇黔知根本尙自有人則聖蹕出楚有望臣
區區狗馬之愚實是如此今聖諭期臣入總端揆出兼機
務此卽具非常幹略者亦不能內外兼圖況庸謏如臣病
廢如臣者乎每讀溫綸諄諄以關中河內比擬桂林皇上
之視桂林原不輕矣且聖意睽睽不忘故都今衡陽克復
且在旦暮方具復永迎駕之疏恭候西幸以信前詔而臣

乃先去此地督師臣之心必疑諸勦鎮之心必冷臣之舉足豈無重輕此所以寧負違命之愆而不敢輕離西土一步也況臣之才具不能過同官三臣臣之精力遠不逮同官三臣又何用此庸庸碌碌不足有無之人而倚毗揆席之重乎爲此特瀝愚衷恭陳謝悃一字有欺神天必殛惟皇上俯賜鑒察臣曷勝惶悚待命之至

永歷二年十一月十七日具奏奉聖旨南楚已有督輔勦鎮殫力戰守所賴卿速返綸扉面商大計朕仍信西幸前詔卿惟亟來勿遲整鞅該衙門知道

舉有功舊將疏

題爲特舉西粵有功舊將仰祈皇上亟賜錄用優擢以鼓勞臣以昭公道事臣惟酬庸報功者朝廷逮下之仁獎恬

抑競者聖主風世之典臣以乙酉年叨撫粵西惟時掌印都司卽錦衣衛南鎮撫司堂上僉書未任李當瑞也當瑞儒門將種丰姿卓犖器宇端凝飭備詰奸每事認真到底靖藩之變罪鎮楊國威脅以共事而堅意不從臣心重之丙戌之冬皇上登極臣移咨衛臣郭承昊題陞今官駕蹕桂林旋復移全入武當瑞以臣畱守桂林朝夕依侍未忍相離慘遭劉兵之變劫掠一空隱匿鄉村至今尙不能具冠服間入城與臣數言卽別去臣勸之赴行在則意殊澹漠絕不以功名爲念也偶與臣談及往事在全在永俱有扈駕之勞臣心訝之據稱崇禎癸未年十一月十五日隨故鎮楊國威今爵臣焦璉統領漢狼官兵四千員名尅復永州擒獲僞官于元偉等恭迎聖駕出城帶領把總涂茂

勳秦勝文等護衛皇上于河干庵中竟日嗣復扈從入粵
駐蹕全州其一切壇褥飲饌供億犒賞皆當瑞索之州臣
馬光轉供御用比奉鎮令調守永州陛辭猥蒙聖諭眷不
忍舍次年二月復修箋貢菲差把總蔣敬祇候萬安于梧
州蒙皇上賜有御札獎慰至今珍藏在家也臣聞其言作
而歎曰有是哉介子推弗言祿祿亦弗及其當瑞之謂乎
永城護駕之功武如楊國威文如高光映或死或生皆已
先蒙恩典矣卽俞灞亦且自疏請加恩矣新興臣焦璉永
州保駕之功獨炳獨懋而久不言功臣等近始爲表暴之
臣以此益重新興之爲人也今當瑞扈駕之功不在諸臣
下卽口不言功知必久厪聖衷特以無人代爲表章故聖
恩久稽耳臣旣知之而終不爲人告使甘恬守拙之臣抑

沒而弗彰非所以昭聖德而勵勞臣也伏乞皇上俯念昔年有功之臣又恥于自暴與躁進陳乞者霄壤懸殊敕下兵部卽行察確特敕召用不惟故舊不遺彰聖恩之浩蕩抑且恬修必獎昭激勸之無私矣臣無任悚息待命之至
永歷二年十一月十八日具奏奉聖旨李當瑞昔年扈駕有功準以錦衣原官召用該衙門知道

存公論重言官疏

奏爲言路與政本相關誣劾于國體有礙特疏申明以存公論以重言官事臣唯祖宗朝建立臺省兩衙門入司封駁出掌糾彈雖品秩不尊而議論與政府相頡頏故政府之過失諫臣能指切之諫臣之直慝政府能優容之相與而後有成也貞觀之初命諫官隨宰相入閣議事史傳以

爲美談而折楹牽裾千古下凜凜想見風概蓋諫臣以敢
言爲名節者也相臣以能容爲度量者也至乃相臣諫臣
旣多牽滯不化之私而宵人匪類又從而爲之誣讎使輔
弼不得行其意臺諫不能安其身國體旣傷中興何賴臣
待罪桂林去天遼遠每一接閱邸報爲之欣慰再四爲之
驚起再四此誠老臣係心闕下過慮深憂誠不能不舉以
入告者如科臣吳其靄以糾撰敕之臣奉有言責攸繫不
必旁牽之旨臣初見此旨頗訝之曰其靄所旁牽者何事
昨始得其揭帖則不過論動臣邦傳不應世守與中書張
立光不應撰世守之敕夫以兵垣而爭此一事其靄職掌
所關卽言責所繫恐未可以旁牽罪之也若謂此敕非撰
自立光應自有撰敕之人御前底稿可覆察也先朝杜漸

之君無有導其納諫悔過之事滿朝習堯舜之誦不敢輕比唐宋之稱一旦有觸犯忌諱冒死上言者不曰譏刺則曰沽名危言則中以他禍清議則目爲朋黨繇是忠良結舌上下之情不通無一人任事無一人執爭拱手聽于庸碌而國遂以誤而亡矣蓋平時有直諫敢言之氣則臨難有仗節死義之臣朝端重封駁還詔之賢則國事收衆謀忠益之利此裴垍所以賞諫官之能言而宋高所以歎朝廷之始尊也若使宰相不優容諫官諫官之名節操守且隨人得而蝮之挾短長而持其後安望士氣再振憲度整肅乎我皇上乘國統三危之後傷人才寥落之餘勵志中興首先納諫正當下求直之文作敢言之氣今僅僅幾言官豈堪催折近見歐陽霖以無罪去國臣竊痛之不謂多

難方殷駸駸欲箝諫官之口無先朝法令防範之嚴而有其摧陷諫官之失臣繙閱邸報寧不寒心總之官去留邪正視以消長臣以聖主期皇上不得不望皇上法祖懲弊獎勵盡職業爭體統之言官誠不獨糾撰敕一人一事而已也老臣激聒自知取厭惟皇上鑒而原之臣無任悚息待命之至

永歷二年十一月二十一日具奏奉聖旨覽卿奏援史命諫官隨宰相入閣議事邇者朕已定三九日會議世守撰敕一經昭揭已定是非公案吳其靈言責所繫自是力爭體統至于重封駁以收忠益卿敷謹論銘右無忘該衙門知道

塘報江西大捷疏

奏爲塘報事本月初五日準督師督部何騰蛟塘報前事
十月二十九日據監軍御史周遠令監軍兵科給事甘永
監紀推官劉遇奇同報稱江西八月初旬有金王軍門駐
扎會城有董□領□兵四萬復來取城殺戮西山一帶舉
義鄉官千人口哨抵樟樹勒民剃髮震動臨袁八月初十
日城內糧盡城外□礮千門晝夜攻打幾破兩門金王迺
厲將士曰今外□薦餓三軍絕食豈能坐以待盡不如大
家出城奮一死戰看天意何如于十一日五鼓親督將士
四面殺出遂將□扎廣潤門火攻一營打破餘營潰亂自
相披靡□□萬級獲□馬萬匹□衆風鶴大黃船萬隻自
棄江干奔下港口去會省遂定是役也□貪逸城外營盤
人人予雄以爲江省必得不料金王背城大戰一鼓遂勝

所有口扎樟樹哨馬千匹郭天才自袁州殺出其騎截斷
所投天才口二千投降之日天才一夜殺盡今金王日發
前鋒劉一鵬領兵四萬入楚會師聽督師調度火牌直抵
鄱縣贛州高口聞知李成棟兵十萬到南雄已于九月二
十八日竄入與國零都山谷一帶吉贛各官已定兩府伏
平等因到臣該臣等看得口口之大隊力攻江西也以首
倡反正之故而我國家之光復中興也亦惟江西勝敗是
視臣等每常拊心祝天曰祖宗其庶幾鑒金王兩勦鎮以
殄滅此口口乎而果然矣斬殺眞口陣奪馬匹搶口大黃
船皆以萬計而鎮臣郭天才自袁州殺出所有口扎樟樹
者一鼓盡殲嗟乎是役也豈非豫國勦臣聲桓建武勦臣
得仁之忠猷妙算感動將士以有此奇捷耶從此江國奠

安南畿震動會師楚省順流東下謁孝陵而奠鍾簋我皇上告廟策勳再規北伐指顧間矣又據稱贛州高口聞勳臣成棟銳然進討已奔竄山谷吉贛伏平臣等仰見天心效順人謀旣臧永贛報復于一時江楚底定于萬里聖算廣運威德無疆謹據奏聞以慰眷注臣等可勝雀躍待命之至

永歷二年十一月初六日具奏奉聖旨覽卿奏江右大捷贛永蕩平從此朕與卿握手庾關直趨金陵銳圖北伐以規一統知道了該部知道

解報余世忠首級疏

奏爲解報躡粵口鎮首級并口篆以雪民怨事十一月初十日準督師輔臣騰蛟咨前事照得口躡西粵民苦苛政

恨入骨髓。口鎮余世忠爲罪魁也。永城恢復數萬。口口盡膏斧鉞。止有口粵撫李懋祖及口將李東斗。夜遁福田。現被我兵圍困。斷難脫網。余世忠爲本閣部標將盛茂。斬于馬下。獲篆。獲馬爲第一功。本閣部思叛鎮世忠。作祟于粵民。欲寢食之。又經貴閣部屢書願得生擒。此獠以雪民怨。今旣就戮。理合將首級口篆一併解驗。以見貴閣部指授之力也。等因。到臣。該臣看得口總兵余世忠口撫李懋祖等。自去冬卽踞全州。其鴟張虎視直欲舉全粵而吞併之。今春三月至五月。抗拒我師。凡百有二旬。而全始克復。然駭喙餘魂。未卽膏刃。復踞永陽。以爲負嵎之勢。我師重重圍困。面面環攻。口之糧道旣絕。城中口兵以及降口之民。刻刻欲投順我營。而余世忠與李東斗。堅不肯降。遂至我

民盡爲口食幾無噍類初一破城之夕三口俱已乘夜脫
奔我兵追而擒之世忠授首于馬下鎮守廣西之口印依
然猶在膊也豈非天厭其兇假手督師標將之斬級以洩
我兵民之憤哉其口撫李懋祖李東斗有勳鎮臣胡一青
等扼于石板鋪冷水灘料不能再延殘喘于斯須矣從此
粵西之門戶益鞏衡長之版圖立歸中興事業不思過半
矣哉臣等敢據督師臣咨奏聞除口鎮首級當卽懸本省
通衢外所獲口篆一顆謹差官解驗伏乞皇上敕部議敘
施行

永歷二年十一月二十四日具奏奉聖旨覽卿奏陣斬
口鎮余世忠恢復永城朕心嘉慰有功勳鎮從優議酬
該部知道

恢復大捷疏

奏爲恢復大捷事十一月二十九日據督師輔臣何騰蛟塘報內稱本月二十日據御營掛龍虎將軍印興國侯李赤心塘報前事稱準貴閣部標下汪正魁屢次撤師本爵于十月二十一日自常德發師于二十二日統各總兵與副參遊都等官領兵恢復取益陽于二十四日抵縣時有長沙徐勇發□兵一千五百羅繡錦發□兵二千來縣渠見我師奮至卽分兵渡江我師當陣迎殺生擒□官并馬步兵一千餘名馬三百六十餘隻弓箭大旗盔甲火器等項不可數計江南□兵接應我兵渡江衝殺□皆潰散復獲□兵百餘殺死者二百餘名捉獲□船數百隻驗明各給有功人員訖于十一月初一日會議各爵兵馬一枝取湘

潭一枝取湘陰一枝取衡山于本月初二日過寧鄉初三日巳時抵湘潭時有偏沅線僞院及僞鎮余世忠督口兵一萬餘馬三千餘匹在縣鎮守本爵同各爵分佈各總兵及副參遊都等官領兵迎殺當陣斬首五百餘級擒獲口口二十餘員馬七百餘匹家屬二百餘口船一千餘號火器盛甲弓刀等項俱驗明在案于十一月初五日又據總兵官何虎副將陳自魁遊擊谷三節等報稱卑職奉令于初三日自寧鄉往長沙離五十里地名白茵舖有披明盛甲口兵一千卑職領衆家兵馬捉獲口兵共六十餘名大馬一百三十七匹并弓箭盛甲各項等因又于十一月初九日據總兵官報稱擒獲湘鄉縣口官并家屬數十餘口衡山縣官已殺獲有縣印見存等因到爵是日日本爵同各

爵會議于十一月十一日直抵長沙俟有捷音另文轉報
伏望大轅速出平定全楚設官分守以安地方而我明世
界當復見于今日矣爲此飛報貴閣部照察施行等因到
案該本閣部看得衡郡爲聖天子湯沐之地本閣部二十
一日甫至衡陽有舊歲三月差往忠貞營副將汪正魁突
至手持忠貞各勳鎮公移拆視之則恢復長湘之捷報也
中興大局始有根腳所有該勳恢復長湘之功載在塘報
公封大典無容後時而制撫堵冒險入夔聯合出長不知
幾許苦心正與東下之師首尾相擊□勢潰散莫知其繇
本閣部不以恢復長爲喜而以忠貞來附爲喜六飛出粵蹕
楚鼓舞諸勳以定兩京不再計而決也此係緊急軍務未
暇疏奏貴閣部與本閣部殫圖中興聲氣刻刻相應煩爲

飛奏請駕施行等因到臣該臣看得三楚爲中原上游而衡長又楚省之上遊且衡同皇上湯沐邑也先是督師臣騰蛟攻永之日屢移臣書曰衡長功夫俱在永州做就臣今乃信督師臣之運算周而布置密矣大師東下勢如飄風而忠貞營諸勳鎮數十萬之兵馬忽同時並集衡旣就理長亦底定據輿國侯李赤心等塘報內稱連戰大捷收復益陽湘潭湘鄉衡山等縣直抵長沙當陣斬獲口首千餘級生擒□□□兵千餘員名潰散殺死無算奪獲西馬千餘匹戰船數千號火器盔甲弓刀不計其數是役也仰仗皇上天威督師臣籌畫鼓舞諸勳奮勇血戰以有斯捷而冒緘出夔聯合誓師不遺餘力忍死以衛封疆者則制輔臣堵胤錫也胤錫兩年苦心收拾李高各鎮而今果得

齊奮戮力以應督師臣騰蛟東下之師此與八百諸侯不期而會者何異日今江省尙阻而楚路已通皇上若不乘此機會迅駕六龍西幸出楚據上游而規中原恐時不再來而各勳鎮戮力勤王之心亟欲覲天顏而不可得不幾大辜其望乎此督師臣騰蛟諄諄囑臣合辭以請也伏望皇上將塘報內各勳戰功偉業敕部宣示中外一面存案候敘一面定期移蹕整旅躬巡毋狃于偏安坐失事機遂遜于漢光武唐肅宗也若楚地新恢兵需全誦督師臣犒勞諸軍至不能備千金臣業同西撫臣魯可藻按臣吳德操多方設措星解軍前以資醪糲亦不敢不報明皇上使知督師臣行間匱乏之苦至于督師臣騰蛟原差副將汪正魁重險不避身入巴歸奉檄徵兵歷數千里之艱苦又

奚帝秦廷七日乎相應并請敕部覆覈並候彙敘以酬勞
蹟者也臣無任翹企待命之至

永歷二年十二月初一日具奏奉聖旨卿與督撫騰蛟
九合元戎今長湘凱聞李赤心高必正等雄冠諸軍制
輔堵亂錫聯屬各部以成大捷朕心嘉悅今刻期恢贛
與勳臣成棟諸鎮並鼓行東下瞻謁孝陵李高諸勳各
另敕示酬汪正魁奉檄辛勤著覆核彙敘該部知道

謹獻芻言疏

奏爲履端方慶聖德維新謹獻芻言以速中興事竊稽往
事漢光以建武元年定鼎洛陽唐肅以至德二年恢復陝
右中興之業未嘗以三年淹也我皇上卽位今三年矣秣
陵松柏尙在望中北平宸園杳淪異域而贛口負固江圍

未解粵東勳鎮之氣甚銳而不能出端州一步者以聖德不旁鬯而主威未上伸也臣請奏其說蓋人主之聰明不日益則日損接賢士大夫之時多則日益接左右近倖之時多則日損以忠直爲至計則日益以佞諛爲芳規則日損比聞皇上臨御旣稀奏對亦罕卽間有召問祇同故事詰難非出皇衷忠悃豈能上悉臣請于日講之外許諸臣隨宜奏事聖心以爲可則面獎之以爲不可則面折之獎之以鼓其氣折之以盡其理令諸臣得隨事效忠而聽不惑至通鑑一書治亂具焉當崇敕一閣臣採其切于時事者節取進講監古之美惡爲法誠則義日明此問學之當廣也唐李錡以叛誅有司籍其家財輸之上京裴垪李絳奏以逆人資財不宜上進願賜浙西百姓代今年租賦憲

宗立從其請陛下卽位以來翠華無定內帑空虛未能施
惠臣以爲未能惠民或先以惠兵自江粵反正未有束脯
斗酒之犒而下無偶語者以上供不足也今有籍沒如逆
騎者當先量犒江粵之師以激其同仇之氣而且明天子
無私藏則遠邇感投醪之誼也此惠澤之當流也設官分
職體統相維用以宣布朝廷德意未有一省之內而上下
不相統者他無論矣卽如粵西一省固皇上之信都也而
除桂平二郡而外道府州縣不知選自何人出自何途文
移未嘗往來竟如絕域昨撫臣魯可藻見鬱林道臣呈報
屬官履歷遂以爲空谷足音則雖使南北盡歸版圖誰是
朝廷選吏臣請自永歷三年始凡各省所屬府州縣官有
不繇銓除不報撫按者盡與開缺補選有恃強不卽交代

者卽行拏究則事權歸一矣此大柄之當操也論功行賞
周家錫以五等漢室賜以實封若一人有功卽與世守一
省則國家幅員除兩京外僅足十三人之功賞矣餘將何
地以酬之臣請依實封之法而推行之論功之大小而爲
公侯伯之次第以公侯伯之次第而爲上中下之食邑公
與一上縣侯與一中縣伯與一下縣天子使吏治之而納
其賦稅焉亦可爲優矣如正在戮力中原克復大物者寧
先定爵不當先定祿先爲之極尤而效之不可長矣此功
賞之宜更也問學廣惠澤流則德邇矣大柄操功賞定則
威伸矣漢光唐肅規模不遠願陛下勿以臣言爲瑱肅清
園陵掃除宮禁不可旦夕矣哉臣曷勝悚息待命之至

永歷二年十二月十六日具奏奉聖旨朕纘服三禩口

患未除僻居海隅深自痛咎賴卿嘉謨匡朕不逮庶幾
黽勉就將以圖光復所奏投醪犒士銓選畫一封賞定
制卽當次第舉行該部知道

明世宗宣公集卷四終

邑後學朱奎鳳校字

瞿忠宣公集卷五

畱守封事

請優賢王之封疏

題爲懇優賢王之封以篤懿親以光盛治事竊見自古開創中興之主未嘗不于同姓之封三致意者所以篤親親之仁而本支百世也我國家大封同姓諸王星列碁布磐石之宗于斯爲盛數年以來寇口交棘名城墮壞桐葉凋零俛仰維藩心焉如惻皇上中興以來于諸藩之流離播遷者無不加恩錫福隆展親之典而忠勤翼戴近如靖藩者臣願竊有請也伏見靖江王亨致厚重不佻溫恭好禮遭前王肆虐備極荼苦檻車旣邁幸襲舊封外當口口之衝內值驕兵之變宮室鞠爲茂草行李齋爲盜資幸廟社

依然藩籬無恙當皇上正位端州也卽欲虛舊府以備行宮迨皇上移蹕桂林也又復捐私橐以充御餉可謂乃心天室克盡宗子之誼者矣亨歟雖口不言功而國家應有庸必錄臣伏察藩封體統一字與二字迥殊而獨靖江與親王無異蓋因開國功高假此以明優異而嶺嶠絕徵尊之以示彈壓也今乞皇上亟因舊寵特降新封易兩字而爲一字錫名靖王在亨歟不過安其崇顯之常而在朝廷已式廣其時庸之誼矣繇此而中原克復秦楚周齊次第畢封豈非中興盛治而于祖制益爲有光也哉臣自撫粵至今五載于茲稔知賢王之忠誼最悉昨年攝禮部時卽擬代爲陳請會事變不果今臣畱守之局旣竣臣將離此土矣臣而不請誰爲請者伏惟聖明鑒察敕部施行臣無

任悚息待命之至

永歷三年二月初三日具奏奉聖旨該部會同宗人府九卿科道確議具覆

報臣孫入粵疏

奏爲臣心久已忘家臣孫陡然入粵謹述臣家慘禍情形仰祈皇上俯賜鑒憐事竊臣自乙酉四月赴巡撫廣西之任未至梅關卽聞畱都之變臣爾時星馳受事抗節逆藩幾以身膏斧鑕繼思文皇帝汀州告陷臣創議端州進箋擁戴蒙皇上鑒臣撲忠待罪綸扉簡命畱守西陲片土不至失陷□□自丁亥迄今三載固無日不拚一死以報皇上以守封疆臣不知有身邊知有家臣妻邵氏萬里相隨今已溘焉朝露矣況兵烽阻隔音信杳然臣家久爲犬羊

之地無從再問乃于六月十九日臣長孫忽然航海而至具知臣家自乙酉七月十四日□兵破城搶掠罄盡臣子壬午舉人元錫竄伏窮鄉不赴□試嗣後行查□官逆產奸胥滑吏迫索株求借貸既苦無門典賣亦已告竭不惟田房籍沒并先世所遺一二圖書畫卷售易一空臣聽之再三恍如親履家園日覩奇窮慘禍也臣孫名澄今改名昌文以臣祖名景淳避水字邊旁也昌文少聰穎長有血性其出門之日不告諸父母不謀諸師友蕭然襤褸被同義士趙延年劉入相間闢海道自浙而閩繇閩入粵不知受幾許風波經無限險阻得達桂林與臣一見終遂其代父尋親之志也古云至誠感神洵有之乎然而爲忠臣者蓋亦難矣爲忠臣之子若孫者抑又難矣臣今日可以死矣

臣雖死而有收骸骨之人矣皇上聞之其亦惻然動念謂
愚朴老臣畱守殘疆庶幾國爾忘家之義可無愧矣惟是
臣歷年拮据血竭心枯食少事煩奄奄一息代乞皇上允
臣前請別簡才望大臣督師楚粵容臣子堯山虞麓茅屋
一楹調理屢軀則未死之日皆皇上再生之年異日駕謁
孝陵臣得追隨顧問使狗馬餘生復返故土臣願足矣若
家園景況將來臣子元錫自能瀝血控陳臣不敢預爲贅
瀆也臣不勝激切惶悚之至

永歷三年七月十五日具奏奉聖旨卿功高擁戴四載
專征卿子元錫百折不回孫昌文萬里赴闕具見忠孝
傳家朕心嘉悅著宣付史館爲中興盛事昌文還從優
加恩該部知道

報中興機會疏

奏爲天意扶明可必人心思漢方殷謹據各路蠟書具述情形仰慰聖懷更祈迅示方略早成中興偉業事臣孫昌文于本年六月十九日重趼冒險來至桂林臣已具有臣心久已忘家臣孫院然入粵一疏瀆陳天聽荷蒙皇上溫旨褒嘉臣實闔門頂戴至八月十五日陞任廣西巡撫魯可藻標下差官厲文慶從江南取道江右直至粵西可藻使文慶來見臣并寄手書知文慶之來齋有江南北義紳密札備述薊國公吳三桂雖駐漢中並無窺取川滇之意現今姜瓖又已反正大同燕薊尤爲震動中原在在響應口實應接不暇豫國公金聲桓雖偶然敗衄而雄心未嘗少墮事機方有可圖可藻又言楚南諸勳鎮自動輔騰蛟

星沙被執一時痛哭震天誓死以圖再舉恢疆雪恥未必不轉敗爲功臣閱可藻之札未竟不覺喜而欲狂正在繕疏奏聞忽臣子壬午舉人元錫因臣孫子去臘離家未知其到粵消息遣家僮胡科探視于七月十五日自家起程今月十六日抵臣桂林公署齋帶臣同邑舊禮臣錢謙益寄臣手書一通累數百言絕不道及寒溫家常字句惟有忠驅義感溢于楮墨之間蓋謙益身在口中未嘗須臾不念本朝而規畫形勢燎如指掌綽有成算據言千古來國家之敗壞惟崇禎十七年之禍爲最烈而中興之基業事功惟我皇上今日爲最易西南幅員且半天下無論非一成一旅之圖而賢臣良將無不臥薪枕戈兵馬錢糧方且川湧雲集豈非大有爲之日乎但難得而易失者時也計

定而集事者局也人之當局如奕碁然楸枰小技可以喻大在今日有全著有要著有急著善奕者視勢之所急而善救之今之急著卽要著也今之要著卽全著也夫天下要害必爭之地不過數四中原根本自在江南長淮汴京莫非都會則宜移楚南諸勦重兵全力以恢荆襄上扼漢沔下撼武昌大江以南在吾指顧之間江南旣定財賦漸充根本已固然後移荆汴之鋒掃清河朔高皇帝定鼎金陵大兵北指庚申帝遁歸漠北此已事之成效也其次所謂要著者兩粵東有庾關之固北有洞庭之險道通滇黔壤鄰巴蜀方今吳三桂休兵漢中三川各郡數年來非熊在彼聯絡布置聲勢大振宜以重兵徑由遵義入川皇上則擇險固寬平富饒之地若沅州或常德爲駐蹕之所居

重馭輕如指使臂三川既定上可以控扼關隴下可以撥
拾荆襄老成謀國當久已熟籌而預決之倘以芻言爲迂
而無當今惟急著是問夫奕碁至于急著則斜飛橫掠苟
可以救敗者無所不用邇者燕京特遣恭順致順懷順三
口進取兩粵于江南楚中各借餉二十萬刻期南下其鋒
不可當而口續順公沈容現扎星涉尤耽耽虎視因懷順
至吉安忽然縊死故三路之師未卽渡洞庭過庾嶺然其
勢終不可遏其期諒不甚遠豈非兩粵最急時乎至彼中
現在楚南之勁口惟辰嘗馬蛟麟爲最傳聞此舉將以蛟
麟爲先鋒幸蛟麟久有反正之心與江浙口提鎮張天祿
田雄馬進寶卜從善輩皆平昔關通密約各懷觀望此真
爲楚則楚勝而爲漢則漢勝也在皇上今日當必不吝破

格之庸以鼓其忠義之氣灰其爲口用命之心蛟麟倘果
翻然樂爲我用則王師亟先北下洞庭別無反顧支綴但
得一入長江將處處必多響集卽未必盡爲佐命之偉勳
亦足以分口之應接疲口之精神使不能長驅直入我得
以完固根本養精蓄銳恢楚恢江尅復京闕天心旣轉人
謀允臧若謙益視息餘生奄奄垂斃惟忍死盼望鑿輿拜
見孝陵之後槃水加劔席藁自裁等語臣反覆披閱雖謙
益遠隔萬里其言豈果當于中興之廟算而彼身爲異域
之臣猶知眷戀本朝早夜籌維思一得以圖報効豈非上
蒼悔禍默牖其衷亦以見天下人心未盡漸滅眞祖宗三
百年恩養之報臣敢不據實奏聞伏祈皇上畱意詳閱特
賜鑒裁臣繕疏方畢適原任川湖督臣萬年策自平溪衛

取路黎靖來至桂林具述口鎮馬狷子駐兵常德實有反正之心年策幾番遣幕士鄭古愛往說馬狷子傾心結納狷子卽名蛟麟者也古愛當亦不久至粵定有確耗以情事度之錢謙益楸枰三局揣摩之語確相脗合似非無據豈非楚南撥雲見日之時而中興之一大機會耶至謙益所稱非熊謂舊輔臣巴縣王應熊也謙益係神宗朝庚戌科一甲第三名進士繇翰苑洊歷宮詹聖安皇帝朝任禮部尙書晉階太子太保口破南京降順北去授口秘書學士今已告病回籍理合一并奏明臣不勝悚息候命之至

永歷三年九月

日具奏奉聖旨覽卿奏各路蠟書

情形朕心嘉悅竚卿早還佐理商確機宜卽日專官再齋文淵閣印付卿開用敦趨還朝厲文慶著魯可藻送

赴行在詳詢另候旨行該部知道

糾罪鎮疏

奏爲罪鎮無君孰甚老臣討逆當先特疏直糾仰祈皇上
亟賜乾斷早申國法以重名器以杜奸萌事竊孫可望爲
張獻忠養子據有滇雲夜郎自大近遣楊畏知龔彝入朝
致貢啟而不奏名而不臣書甲子不書正朔識者爲之寒
心舉朝莫不色動前見皇上卻宵小之議運獨斷之明賜
名朝宗錫以公爵在可望榮已極矣在朝廷恩已厚矣蓋
祖宗朝從無異姓封王之制與其違制而長奸不若守法
而自立也一時海內咸仰頌聖明之斷即可望聞之當亦
感服無辭豈意忽有賣國大奸胡執恭私入滇矯詔賜可
望秦王之寶敕書中載有朕率天下臣民以父師事王之

語千古異變史冊所無臣聞之驚憤欲絕不容不爲皇上
痛切陳之者執恭爲慶國公陳邦傳中軍冒濫軍功叨晉
五等其入滇以今年正月是時可望所遣之楊畏知龔彝
尙未到也人臣無境外之交執恭不奉詔敕私通敵寇已
犯不赦之條當其毅然而往不能少待豈真恃其說力足
以服可望使稽顙請降哉說者謂其奉邦傳之意旨可望
而就撫也則遠交近攻爲挾可望以脅朝廷之地可望而
不降也則執恭且爲邦傳納款之使暗通可望外輸國情
中行去漢而匈奴日侵巫臣適吳而楚國奔命執恭此行
固已知其必不靖矣觀其僞敕所稱兇逆不倫崇之以監
國是居攝之文也許之以九錫是遜位之漸也推之以總
理朝綱節制天下文武兵馬而事之以父師是請降之書

也可望未通之先其自號不過二字王耳乃反以一字尊
之其請內附也亦明知戴天子耳乃反以監國讓之可望
拜命之後方將納土請吏戮力疆場而反以天下兵馬錢
糧及文武官吏悉受節制則是爲可望勸進而執恭卽登
壇奉璽之褚淵新朝佐命之賈充也可不令人寒心迸落
血淚者哉可望未我降而我先降之可望未父師而我先
父師之可望未納土請官而我先納土請官之料可望本
無此想今執恭固教之矣以律斷之私行宜斬矯詔宜斬
亂祖法宜斬破壞撫局宜斬至於矯推監國假以帝權是
叛也是篡也恐非赤族之誅不足示大逆之戒去年東勳
反正之初忽有僞詔刊布臣始而駭旣而恨專疏駁正請
所處分不知何以畱中未發而若輩手滑膽粗更無忌憚

今茲所爲非卽去年故智養成積漸者乎勳臣邦傳素明
大義年來舉動乖張物議騰沸先改居守之敕爲世守出
于矯旨撰文之張立光受封慶遠府之思恩縣竟云食采
思恩府由于違制擅請之辜延泰今執恭爲邦傳中軍壞
祖宗之舊章肆叛亂之形跡誠不知其以逢迎可望者逢
迎邦傳抑不知其以脅制邦傳者脅制朝廷知邦傳亦必
痛心切齒于執恭矣臣沐浴請討謹先特疏直糾惟我皇
上大奮乾綱速頒明詔正悖逆之誅布告天下臣民共凜
尊王之義抑臣更有說焉璽書者帝王守天下之器也近
來空敕濫給有空敕卽有矯詔安知執恭所矯之僞詔非
卽邦傳所請之空敕乎臣前具奏空敕不可輕給若有見
及于此者望皇上益加嚴密早杜空敕密敕之端威福一

操自上賞罰惟本至公此尤治亂安危一大關鍵也伏祈
鑒奪施行臣不勝激切待命之至

永歷三年十一月初三日具奏奉聖旨鑒卿奏持國體
遏奸萌具規忠猷謹議這本內事情著禮兵二部嚴察
確議具覆

謝御奠疏

奏爲恭謝天恩事臣自顧衰庸惟餘樸蕘盡年臻六十臣妻
棄臣而逝固臣福薄德闕所致夫復何尤獨是患難以來
皇上遠蹕楚粵臣以一身畱守西都兵禍口禍時無寧晷
臣妻經營餉饋與臣同守危疆碎簪珥以享士捐軀命以
全城臣妻皆有所不惜而一以義命經常交相躡勉願不
死于兵不死于口而死于疾病亦其存心種德之報伏蒙

寧聖皇太后
昭聖皇太后
各賜祭一壇幽魂慰藉臣藉諸典禮近代所
無具疏控辭不獲乃于本月二十二日拜御奠于桂林東
郭停輜之處桂數罹口驚而臣仍厝柩于東郭者臣妻存
日與臣同守危賊瀕死不去今雖萎謝魂魄猶應瞻此且
當全陽未復之時人心疑懼臣措之郭外以示其安定不
移之志爾祭之前後震霽陰霾受奠之頃天色晴明是又
聖明覆被之一徵也臣謹具表稱謝兩宮皇太后外謹此
奏謝臣臨奏無任感激涕淚之至

永歷三年十一月十八日奉聖旨覽卿奏謝
太后各賜祭壇之恩已有旨了該部知道

賜金箒圖書疏

奏爲恭謝天恩事本月初十日司禮監隨堂太監沈嘉熙

齋到欽頒犒師銀兩到臣復蒙皇上賜臣精忠貫日金圖
書一方金爵一執表裏四端臣惶汗不知所出君恩隆渥
賜賚稠疊尙方之賜時及老臣臣自念德薄功微止此樸
誠勿渝勿二鞠躬盡瘁此臣子職分當然何足煩聖明眷
注若此臣當設香案闕叩頭外伏又念臣兩載以來所
存圖籍器用俱爲亂兵洗劫布幃瓦礫而外盡以犒師享
士卽知交戚友之誼或以樽斝相遺者過日卽以贍軍四
壁僅存江山不改所可自信以取信我皇上者此耳八月
中臣犬馬之齒六十蒙皇上賜臣金爵一進臣以勳臣志
建累捷更倍復全之功舉以贈之茲蒙皇上再賜隨易名
馬以贈與寧侯一青弗敢私君恩亦非敢褻君賜也臣不
敢不告明爲此具本奏謝無任感激悚汗之至

永歷三年十一月十八日奉聖旨覽卿奏謝圖書金爵表裏并述轉贈各勳以鼓同儕具見公忠知道了該部知道

服闋御史請入班供職疏

題爲父制旣闋臣職宜明懇賜代題還內以循言職事準服闋御史楊林芳具呈前事據稱職于永歷元年二月內考選今職于本年七月二十一日痛丁父憂就于九月初九日懷遠縣迎駕具有恭報微臣丁憂一疏當奉有楊林芳著墨綾辦戎之旨正值武攸告變聖蹕南幸職雖苦塊棘人敢不俯竭愚分爰抵窮荒聯絡夷崗結納義士譚時中粟華錢等二百十有七家捐貨器藥計擒勾口覃黨黃金將龍金環張鶴齡陸文麟等口帥勢窮歸正黎靖重還

舊版此職在縑經中舌敝血枯以求一當險阻艱難無不備嘗者也續蒙皇上鑒職微勞頒敕獎諭給以關防復不意郝孽突靖兵民蹂躪又欲挾職入營陷以叵測職堅持數月憂憤病篤幸得不死以至于今計職守制月日今二十一日已禫盡矣職兢兢奉命辦戎家憂國難泫然不知何從者今庶可少追矣獨念職四年邊吏六被薦章纔叨考選隨丁父艱苦撐粵臂又復三年同咨考選如魯可藻瞿鳴豐久歷崇階而唯職偃蹇戎行憂勞身瘁仰懇老師相閣臺代賜題明分道實授俾令沿途調理病痊供職庶少追昔人塞謗之風亦不泯歷年艱貞之苦矣等因到臣該臣看得御史楊林芳筮仕北流著有善政歷經薦剡皇上監國之初咨取考選元年二月同魯可藻瞿鳴豐鄭問

元等五人臣署銓時合疏具題奉旨改授今職俟到部日另題分道本官適丁外艱具疏報聞今當服闋例應赴部具題分道入班供職本官雖居苗崗而能倡義集師綢繆古坭懷遠一帶其勞績實不可泯且臺班中資序之深無出林芳之右才識之老亦無出林芳之右相應代報送部卽與具題者也伏候敕下該部院施行

永歷三年十一月十八日奉聖旨覽奏服闋御史楊林芳墨綬辦理戎務倡義集師綢繆著績著與分道優用該部院知道

述湖南近日情形疏

奏爲恭述湖南近日情形事本月十四日準總理恢勦兵馬右僉都御史米琦塘報內稱本院自入桂以來屢使通

楚音耗七月內繇小路走永寧欲取道古泥過靖綏聯合
楚師行至桐木地方驚聞融縣叛逆楊晚曾海虎等劫殺
鄂國標薛總兵之變又值沅靖復爲□陷猺獠乘機虎鬪
只得返轡永寧隨差都司陳端守備劉忠顧覓鄉導前去
今據陳端塘報內稱王進才馬進忠諸營俱扎大洪江小
洪江五羊團洞口一帶連營四百餘里精兵四發每日與
□相持打糧兵卒常有至崖坪四十里外者又據標兵黃
福自沅州來稟稱親見南寧侯張光翠去沅扎鎮遠築水
司袁應弟扎天柱鄂國公馬進忠扎洞口洪江一帶牛萬
才扎激浦地方郝永忠兵扎中潮圍遠安其沅靖俱爲□
占哨馬時出綏寧雙溪靖州□兵不過三百人後我兵復
沅□膽頗喪百姓復有思漢之心等因又據本院將官張

日新等報稱靖□無幾自遠安被害後辰□馬蛟麟卽發
□兵至中潮一帶將郝永忠營衝散屍骸蔽江而下者半
皆有髮土人蛟麟兵今與閆韃子合營徑去靖州會□撫
戴國士又郝營中東安王亦至崖坪復與遠安鎮將結盟
舉事又報牛萬才已復激浦王馬精兵盡下武寶其王馬
老營後尾仍在五羊等處靖黎□官亦遁等情又據樞詞
臣張同做寄臣書云永□李東斗又進城張固山在衡□
王在長沙馬鄂國有志長沙云尙未發荊州鄭□來救長
沙常德□亦慌張此監紀譚夏玉從□中來所云也又據
監軍御史藍亭塘報內稱本月十五日據前鎮總兵官周
尙禮稟報張光翠之兵自四月間駐沅州與□相持于九
月二十九日已復靖州矣武岡□將姓楊領有六七百人

駐守寶慶其新寧先有蔣戴陳等恢復今棄入西延峒誘
□擄殺□□屢敗數不滿千鄭太和亦在武岡設有內應
之策各等因到臣該臣看得□以全力攻我湖南諸勦糧
盡地逼勢不與□俱存□勢雖合而實分我師雖分而實
合據所傳聞有南寧恢復靖州之信有馬營將發長沙之
信雖其事未盡確而王進才馬進忠之勢尙旺郝永忠之
力已疲則斷然無疑者臣與理臣毛壽登米琦購使間通
無慮數十輩特以□□中隔兩臣不能徑詣各營俟寶武
告復便可星馳料理謹將湖南近日情形據實具奏伏候
敕旨

永歷三年十一月十八日具奏奉聖旨據奏湖南近日
情形先後各塘報甚悉寶武指日通行毛壽登米琦便

可星馳整頓知道了卿宜密授方略佇奏膚功該部知道

請酬閩司勞績疏

題爲閩司勞績堪酬兩載未經恩擢謹會疏題明特請專
敕實授以勵勞員以鼓後効事臣惟桂林片土控三楚之
上游踞兩粵之形勝自口逼兵殘危而復安者再四亦賴
有文武諸臣爲之戰守耳然能守者未必能戰善戰者未
必能守臣督師三載深歎將才之難也迺有戰守兼長謹
嚴紀律者與民無擾有俾地方者反不獲受朝廷實秩之
榮亦何以作士氣而展其壯略哉如興寧侯胡一青標前
署總兵官管廣西都使司印李成龍籍系中州胸懷勇略
去夏恢興恢全□□□級戰功懋著其載在薦剡者歷歷

可考督輔臣騰蛟咨臣委署司事臣等方疑其爲戰將也未必能撫循軍伍而在任以來訓戢衆軍經年防守今歲五月主客兵闕廂城騷動成龍不避勞怨殫力調停以俸無從支之官糧無從支之軍而能支持調遣收拾兵仗采辦火藥以供應滇師之悉索卽久散之軍卒設法招徠不至盡潰蓋成龍之奔走周旋辛勞罔憚忠誠慷慨遇事敬持實于地方相宜況當日全城恢復內地無虞成龍固守周密之功實不可泯也茲勳爵諸標盡荷加恩而成龍有大樹之風人稱不伐乃任勞獨久竟未實授雖前按臣吳德操疏請實補給與專敕奉旨下部迄未覆行成龍卽不言臣願安敢蔽抑有功而不爲之代鳴耶謹會同兵部右侍郎加陞一級兼巡撫廣西地方提督軍務兼理糧餉都

察院右副都御史臣余心度巡按廣西監察御史臣朱由
抹合疏具題伏乞皇上俯念勞將戰守兼優立敕該部察
前後著績將李成龍實授正總兵加都督同知仍管廣西
都使司事照例補敕書一道庶以酬前勞而鼓後効于根
本重地資其捍禦非小也臣等無任惶悚待命之至

永歷三年十一月十八日具奏奉聖旨覽卿奏李成龍
後先著績恢守多功請加職銜併給專敕以策後効該
部卽與具覆應兼職銜一并議奏

繳閣印伯印疏

奏爲恭繳閣印伯印事本年二月錦衣衛指揮徐文奎齎
到文淵閣印一顆命臣收用四月中又蒙皇上差禮部儀
制司主事李來齎發臨桂伯印一顆因來行急未攜頃全

永撫臣馬光到省順齋付臣臣惟閣印必入直在閣方可
開用臣雖忝揆席而有事畱守則閣印應還之入直之人
故自頒給到今塵封未啟至若臨桂之封臣已辭于二年
之前寧有冒昧受印之理業經具疏懇辭爲此特託司禮
監太監貢昇繳進御前臣從此可以少安矣爲此具奏

永歷三年十一月十八日奉聖旨卿奏繳閣印伯印具
見搗謙但閣印專副卿開伯印久頒成命何復遜辭著
差官齋同彰酬庸特典該衙門知道

恢復靖州疏

奏爲飛報恢復靖州事本月十七日準錦衣衛都指揮使
充總兵官掛刺奸將軍印前軍都督府左都督劉之良塘
報前事據稱十月二十八日本營分路出師誓取黎靖五

路進兵於初四日四鼓圍靖州城攻打到巳時破城斬口
千餘其首口冑芳譽以及口文武官員追趕河下溺水而
死得獲西馬九匹明盛明甲四十三副器械不計其數通
道縣口官及長安堡官當已生擒正法事關恢復大捷理
合塘報次日發兵進取黎平俟捷日另行飛報等情又準
鎮守懷融古泥地方總兵官曹應元塘報前事相同各報
到臣該臣看得綏靖當黔粵之衝諸勳棄而不守以致口
口盤踞西躡黎平則全黔之門戶單寒南窺融懷則粵右
之肩背震動今幸諸鎮僇力一鼓蕩平靖口冑芳譽戰敗
溺水從此收辰沅而恢永寶皆于此始基之矣據勳臣王
進才營中副將張文標于本月初六日到武岡報稱王營
現在靖州督臣于元燧遺臣手書謂靖州現爲勳臣王進

才恢復則似進才之功居多而遠安舊部或從而助之者尙容察確另報爲此具奏

永歷三年十一月二十一日具奏奉聖旨恢復靖州勳臣進才及劉之良曹應元同心協力楚黔咽喉以通粵西門戶可固朕用嘉慰有功將士俟卿察確題敘該部知道

恢復永興耒陽疏

奏爲塘報恢復永興耒陽事本月十七日準永國公曹志建塘報前事據稱本月十二日本爵接得總兵官王三才郴州知州藍天麟等塘報報稱九月二十五日奉令諭調集臨藍新嘉陶李朱任等鎮大兵分撥埋伏江村木壘十八十九將口口盡行殺敗所剩殘口口盡奔永衡除一面隨

發大兵直搗永城外所有永興耒陽一帶地方該鎮等亟宜乘勢□□恢復今特密授方略卽統官兵恢復永耒毋得遲遲等因奉此三才等恪遵方略和衷籌畫先經密差的當人役各處偵探有□□張固山夏牛祿馬步數千盤踞永興耒陽三才等卽商議統率官兵前進勦殺九月二十九日辰時發馬騎直抵城下挑戰□□出馬步數千迎敵三才等步兵隨至接應用銃礮打死□□三十餘人□□敗退入城堅閉不出三才等設計分撥官兵初一夜銜枚前去離縣五里外埋伏初二黎明親統馬步打仗戰至日中我兵詐敗□□儘力追趕三才等卽放號礮伏兵四出大戰火礮齊發□□死戰不能抵敵我兵大勝陣斬□□四

百餘級生擒二百六十七名奪獲騾馬五十七匹弓箭器械無數餘□奔潰不敢入城徑望耒陽逃竄三才等隨擁入城中□□止有守營三百餘人盡行斬訖所獲難民男婦一面察發寧家本日晚收兵休息仍嚴令官兵愈加謹慎隄防三才等商議乘勝追殺使耒陽□□不及設備一鼓可克于初三早卽統大兵追襲前去不意耒陽□□見永興敗□至耒陽又聞我兵隨後追到不敢迎敵遂卽奔逃下衡去訖三才等官兵初四午時入耒陽城中所獲遺下難民男婦察發寧家三才等欲乘勢追襲耒奉方略不敢窮追今二縣已復亟應請委官員料理地方安撫百姓所有戰勝恢復大捷理合塘報等情本爵看得□□盤踞險塞不翦狂鋒則城守屹壯不墮屬邑則餽餉益甚此永

耒二邑之復實繇春陵摧折餘威先聲奪氣故不勞而功成也本爵雖殫精竭資克壯國威亦庇籍貫閣部妙算遠猷屹立如山自此指茶攸則星沙勢孤出猶義則虔吉吭斷援江救楚無不可者除一面具奏外相應塘報煩爲轉報施行等因到臣該臣謹看得□□盤踞湖南名城大都蹂躪幾盡披圖屈指止勳臣志建兵馬所札州縣屹然孤壁耳自八九月累捷之後我氣旣振敵鋒益靡永與西走榔桂耒陽北接茶攸順流百里直出衡山向因忠貞內潰故二邑遂以予奪今耒耒旣得則衡□有旁牽之慮而永陽之氣益孤從此正兵出永偏師出衡皆有建瓴破竹之勢而總兵官王三才等之凜奉方略先登敢戰之功實不可泯伏乞皇上敕部從優議敘臣一面督促各勦合師進

搗諒永城餘孽廓清在旦晚間也謹具奏聞

永歷三年十一月二十一日具奏奉聖旨覽卿奏永興未陽相繼恢復湖南殘口已在目中勳臣志建鎮臣王三才等俱候彙敘議酬該部知道

請借上供銀兩疏

奏爲楚勳功在粵西粵餉已無餘額敬陳萬不得已之情借分上供御營之數少濟楚師之急事竊照廣西額徵錢糧二十四萬一千零八十一兩經戶部再三詳議蒙皇上欽派已定永爲遵守總計上供御營四萬兩慶國公陳邦傳新興侯焦璉各六萬兩慎曹兩營各二萬兩宜章侯盧鼎一萬二千兩梧鎮一萬一千三百七十六兩臣標督撫標共一萬七千七百餘兩而粵西之額止此矣維是潯南

思太柳慶梧七郡概不可問徵特臣標撫標之一萬七千
除臨桂一千九百餘兩外餘俱無從徵取卽焦營之六萬
亦強半在柳慶各郡無能取盈也四月中客兵入省興全
盡陷滇餉之分派興全者何處徵給只得于桂林所屬通
融接濟而客勦旣以兵多餉缺爲辭主動復以顧客忘主
爲怨且同一客也身在楚則應食餉于楚功在粵卽應分
餉于粵而粵餉之額編已盡楚師之騰飽何資然不得不
于無可設處之時爲權宜救濟之策如武陵侯楊國棟者
向自入粵以來與滇營共守省會與焦營同扼開州當人
情惶惑之時獨倡扎營堅守之計和衷共濟正論相鬪卒
使危疆奠安諸勦戢睦不可謂非國棟之功也至其嚴飭
紀律愛養士民寧忍饑以荷戈而不肯侵掠百姓每枵腹

以出戰而未嘗逼迫督師尤爲人情之所難者方今永口
負嶠國棟方當秣勵長驅與滇師分路並出而一軍噉噉
未免向隅則臣之所未安也願派之臣標者旣無處徵收
可供撥派派之諸勦者復不能割捨成額聊當分餐臣等
再四思維攢眉無策伏念皇上軫切封疆分膳發精渥恩
累被中外歡騰皇上方將借東餉以餉西兵豈不肯損上
供以飽戰士不得已請于部派御營四萬兩內分借萬兩
少救目前議將臨將縣一千三百九十四兩藤縣三千兩
賀縣三千二百七十兩陸川縣二千三百三十六兩共足
一萬兩之數以爲勦臣國棟守粵之餉待楚地漸恢出楚
有日然後仍歸上用想亦聖明所不靳者除一面責成該
管官照數徵給國棟外理合奏明伏乞皇上俯念時艱立

爲鑒允庶饑軍有贍給之策而戰士張敵愾之威矣臣無任惶悚待命之至

永歷三年十一月二十一日奉聖旨覽卿奏勳臣楊國棟堅守粵西志恢楚疆功績懋著其糧餉未經派給準撥御營銀一萬兩就近支取以佐飽騰該部知道

賢王宜優異疏

題爲賢王勞勩難泯聖朝特典宜隆懇察前旨晉封以示優異事臣惟賢親茂著宗子重藩屏之封典禮停庸聖主首尊親之報如承祀楚藩大宗通山王蘊紆者系出楚昭序承嫡派驅馳戎馬五載危疆曩歲郝孽來奔本藩力請督師彈壓悍勩身勞心苦今夏楚師入粵本藩親冒鋒鏑調停主客舌敝唇焦今全陽已經再恢勞苦誠不可泯邈

自元年十一月十四日督輔何騰蛟以齒序昭明題請奉旨覽卿奏楚藩應襲有八府保者著卽與察覆其大宗稍俟平定舉行蘊紆且嗣封通藩郡爵母替厥服該部知道欽此本月十五日又署禮部大學士臣王化澄覆奏改票奉聖旨覽卿奏藩楚通山郡爵有永安江夏等八府保給準卽承祀大宗永綿藩服該部速察典例覆行欽此本年十二月內又臣署禮部事覆題奉聖旨蘊紆準續通山王爵冊以敕代印聽部鑄呈驗頒給其大宗稍俟事平舉行該部知道欽此夫旣俟事平舉行臣復何言臣察楚藩譜系始封昭王生十子莊王嗣封而外巴陵壽昌岳陽景陵無後崇陽以罪除其傳國者止永安通山通城江夏四郡而已憲康二王暨大冶王俱無嗣靖王以東安王子嗣立

生端王端三子愍王武崗保康而保康又絕愍被殺次子襲封是爲恭王恭王新諡定王定王四子世子監利鐘祥與國世子生三子俱死獻賊之難然則今之應繼大宗者止興國監利鐘祥之親枝耳外此嗣封之王其爲楚昭之子則有永安通山通城江夏四王其爲莊王之子則尚有東安其爲端王之子則尚有武崗羣稱本支其爲楚系其長幼齒序之別自無容分毫紊亂而時平則先嫡長世亂則先有功通山王蘊紆固有功之王也舊督臣騰蛟以其功而爲之請臣亦以其功爲之申伏乞皇上敕下宗人府禮部察照臣議以功晉封令蘊紆承襲大宗庶本支無爭立之釁而賢宗無不平之歎矣爲此具題請旨

永歷三年十一月二十二日奉聖旨覽卿奏通山王蘊

舒疆場勞瘁矢志同讎以功晉襲用酬久勛朕知道了
第藩封大典譜系攸關著宗人府同禮部會議妥確具奏
請力破積習疏

奏爲中興有大一統之規模刑賞有不容弛之政柄懇乞
聖明大振乾綱力破積習以尊國體以挽頽綱事書曰惟
辟作福惟辟作威惟辟玉食惟威福操之自上故玉食貢
之自下豈僅存守府之空名而盡捐刑賞之大柄哉我國
家熙洽三百年禮樂征伐無不統于天子國難頻起世數
中更聖安思文之世亦少陵夷矣我皇上繼統以來楚蜀
滇黔遠奉正朔而兩粵近在輦轂一切刑賞之大政獨多
壅阻不行如官人統於吏部今或州縣印官且待外咨坐
補矣又其甚者區區兩粵竟分畛域東人自東西官自西

一王之土判若兩家銓臣注選彼此瞻顧究同畫諾而已而四方負才抱略之士無從展抒無從求售反多重趼跋涉投止桂林大者欲得臣題以京秩次者欲得臣委以有司因而銓部且有谷臣補缺之事豈疆輿之廣止桂林一二府供朝命之驅遣乎是何畛限之隘也夫粵西官方之壞始于勦鎮邦傳之橫司道府縣不繇部選游棍雜亂流行委署故或到任一二載而朝廷不知其賢否或一縣更易數十人而撫按莫知其姓名相習成風恬不知怪昨年勦臣李成棟反正之後聖駕蹕東成棟取東粵全省官吏造冊送部疏請聖裁忠摯搗謙尊君守禮乃廟堂之上因循沿習以待西勦者待成棟豈成棟之志哉臣猶聞梧州知府東玉受委之日勦臣成棟命之日爾至地方須要清

廉潔已做好官反正一番事事以遵朝廷奉皇上爲主朝廷若選新守來汝卽讓之勿與抗也卽此一端成棟忠謹之心亦可見矣臣不知在廷諸臣何憚而不循制守法以成人之美也又如朝廷一切大政總在敕旨敕旨通行總在六部都察院咨劄撫按仍嚴切責成撫按官每年終奏報欽件以已完未完分數爲考成若部院不行文於撫按撫按何所據以奉行是視明旨爲虛文而委之草莽也歷年所參處文武各官俱奉旨撫按究問此關係各省興革利害大政與察覆官方錢糧各事件俱奉旨撫按衙門奏報而所司一概不行該部院豈無章程該科亦未聞參駁然則貪殘敗類之夫橫行無忌悍弁士宄劫殺大吏于畿輔之地嚴旨詰責視同故紙莫敢誰何職此繇耳卽如柳

慶撫臣劉肅等之被戮此何等大事曾奉勘問之明旨乃從未見部院有一咨一文責成該撫按遵旨訊問者是何法程是何世界耶刑賞之權既不操之自上將來紀綱廢弛國法凌夷朝廷日弱封疆日危寬以用人而適以病民寬以廢法而并以病國天子僅有空名風稅不歸天府福威之柄弛玉食之途隘即使舊疆盡復兩京盡恢而官方賦稅不繇銓計一切用人行政強藩盡得操之則壞法亂紀之罪臣等猶不能辭之也伏乞皇上嚴敕中外文武各官猛圖振作大破因循用人勿分東西之畛域行法勿廢祖宗之典章庶方域通而主威尊敕旨行而國法振矣臣無任惶悚激切待命之至

永歷三年十一月二十二日奉聖旨用人統于吏部不

得私自委署遺害地方其一切欵件立限完結俱著嚴加申飭以肅政體仍將發過咨劄逐件奏明庶延遲不結之責有所歸該部院知道

簡舉誤薦疏

奏爲學差之題薦偶誤臣愚之罪狀難辭特疏簡舉仰祈聖鑒事臣前以監軍御史江見龍請督粵西學政蓋實見黃士彥久已物故科考不宜停閣見龍以乙榜臺臣而又文行兼優儼然玉堂佳品竊謂俾之程士必有當也近閱邸報見吏部覆臣原題中興首先文治學使須用臺員一疏奉聖旨江見龍才堪軍旅仍以軍旅用之粵西學臣前按臣由抹請補久有旨了吏部速推甲科中文行兼優的看欽此臣捧讀未竟不覺悚然汗下措躬無地也從來督

學必用甲科此舊制也臣于元年之夏曾以臺臣吳德操
奏請督學而皇上不允今又舉江見龍于三年之秋臣之
惇謬何如者乎皇上未識見龍能知其爲軍旅之才臣目
擊見龍朝夕聆其議論丰采而反欲以軍旅之才混膺俎
豆之寄臣之昏昧何如者乎兩粵皆用學道而臣必欲改
爲學院臣之意不過謂兩粵旣爲皇上發祥之區猶之畿
輔也卽暫改道爲院倣兩都之制亦無不可者況楚中已
有馮珙之例可比則亦非爲創舉而豈知舊制必不可更
瀆請徒增罪案臣之率妄又何如者乎按臣由抹亦疏請
學臣者也按臣發疏而臣不知近奉旨後取揭觀之亦不
過謂選擇名臣來任厥事而臣必欲舉一人以當之似按
臣公而臣私矣雖見龍羈旅入粵蕭然一身臣可自信人

亦可信臣然臣疏大屬可省今以多言賈戾臣侵越之罪
又何道乎摠之臣衰病餘生心智謬迷徒懷以人事君之
誠終乏盈缶有孚之術雖皇上哀憐曲照不加斧鉞然忝
爲輔臣至一言不能取信于皇上此則臣之衾影不敢卽
安者也用敢特疏簡舉仰聽聖裁至于臺臣江見龍旣奉
有仍以軍旅用之之旨似宜與之分道頒給敕印方有實
責若仍舊以虛銜浮沉戎馬至不得與他途雜進者齒遇
此聖朝無論展布無地而名用實棄恐非所以信明旨而
隆甄敘也敢因認罪而并及之伏惟聖鑒施行

永歷三年十一月二十三日具奏奉聖旨卿以人事君
出于至公朕所鑒孚江見龍才品懋著內外俱可表見
著分道實授赴行在供職該部院知道

請監軍分任出楚疏

題爲申請監軍臺銜分任出楚以責實効事臣前具題監軍諸臣一疏蓋據勳臣趙印選原揭上請雖不無賢否混淆名實貿亂之咎然其中如李樹琪倪秉秀兩臣獨係起家科目歷任有司且隨故督輔臣何騰蛟行營恢勳備著勞勩者未可與他人同類而並議也兩臣逡巡候命未見部覆近於他疏中始見有李樹琪倪秉秀已經吏部覆定職銜之旨似謂二臣不應驟躋臺班也在兩臣引分自安極知崇卑皆是君恩內外皆爲王事已不敢更萌希冀臣亦不敢再爲補牘矣昨因武崗黎靖次第報復勳臣趙印選先已分兵駐防急須才品文臣監軍理餉兼行撫綏勳臣以樹琪秉秀經濟素優輕熟堪駕必欲強之任此兩路

兩臣雖義不辭勞而官職未定事權不屬又不便輕身受
事自非假以京秩所至強勳大鎮輕而玩之安望其調戢
兵民呼應皆靈乎臣從封疆起見未敢避冒昧之嫌伏望
皇上俯允臣請各授以監軍御史頒給敕印使樹琪監黎
靖一軍卽以規取辰沅責之使秉秀監武岡一軍卽以恢
寶責之斯亦鼓舞勞臣綢繆疆事之急著也爲此具題伏
候敕旨

永歷三年十一月二十三日具奏奉聖旨覽卿奏請李
樹琪倪秉秀各予臺銜充滇營監軍一出黎靖規取辰
沅一出武岡恢復寶慶該部卽與具覆

奉天大捷疏

奏爲飛報大捷事本月初四日據總督兵部尙書于元燧

差官露布報稱十月二十七日鄂國公馬進忠襄國公王
進才等已復武岡隨據該差口稱各營追口截殺就于三
十日恢復寶慶其確實功次及口口恢復城情形俟各勦塘
報彙集容臣察覈另具塘報外初五日子時又據新寧侯
趙印選塘報爲飛報大捷事本月初四日亥時準前鋒興
寧侯胡一青報前事內稱本月初一日據前協鎮張拱濟
報前事內稱卑鎮等奉爵主密授方略於前月十四日統
領兵馬前援新寧甫至新寧卽獲大捷已經塘報外隨卽
調度兵馬于前月十八日直抵石門放礮與口相遇口口
四級獲馬二匹次日清晨又分路放礮一枝出石門一枝
出石山背方至石門遇口大隊而來見我礮馬不上二十
口口拚命來衝我兵且戰且退未幾而石山背之兵從安

星觀殺回正遇□□趕我石門之馬兵回頭殺去前後夾
攻□遂大潰次日午刻直抵奉天城下至水南橋駐扎圍
住四城門□楊守備見勢危迫有意投誠猶復負固因廿
五廿六大雨不便攻城廿七日卑鎮等繇玉帶橋灘上踰
水過河大勢齊攻果然一鼓而下生擒楊守備生擒陣斬
無有遺者本營所獲□馬及擒斬功績俟察確另報等因
該本爵看得奉天僻在三楚上游奉天一日未下永衡終
是負固本爵所以一至全陽卽分遣各鎮前進又屢書遣
官力促王馬諸勳協力夾攻今奉天一得寶慶卽在指顧
楚事漸易苗矣除一面具奏外理合塘報其有功官兵俟
察確另冊等因各報到臣該臣看得楚南奔潰之後獨武
靖諸營堅持寶武山中力抗□鋒累戰不挫臣久從間謀

傳聞屢檄各勦會師合力先收永寶並下衡長而今楚勦果建奇功迅掃武寶之勁口業據內地之要害臣聞之爲皇上慶眞狂喜不禁矣而勦臣印選一青發鎮臣王永祚等偏師扼住新寧接應恢武轉戰一月武新兩處盡歸版圖從此粵西之門戶旣固楚南之口勢益衰現今勦臣趙印選胡一青焦璉楊國棟等合兵圖永計日可定而王馬諸部聲勢已合臂指可通於以恢寶慶而取衡長知非難事也爲此具奏以聞

永歷三年十一月二十三日具奏奉聖旨覽卿奏武岡恢復諸勦合勦湖南勢如建瓴朕心嘉悅有功將士冊到彙敘該部知道

開禧忠宣公集卷五終

邑後學屈

軼校字